

**CPR-imut inatsisip allannguutaanut Kunngip peqqussutaata Kalaallit Nunaannut
atuutitinneqarnissaanik peqqussut pillugu Naalakkersuisut oqaaseqaateqarnissaat
pillugu Inatsisartut aalajangiiffigisassaattut siunnersuut**

(Aningaasaqarnermut, Aatsitassanut Nunanullu Allanut Naalakkersuisoq)

Akissuteqaat

(Aningaasaqarnermut, Aatsitassanut Nunanullu Allanut Naalakkersuisoq)

Aappassaaneerpeqarnera

Aallarniutigalugu Inatsisinut Ataatsimiititaliaq Naalakkersuisut sinnerlugit qutsavigissavara isumaliutissiissummik sukumiisumik suliaqarsimanera pillugu.

Naalakkersuisut maluginiarpaat ataatsimiititaliap innersuussutaa, tassalu peqqussutissatut siunnersuummi teknikkikkut kukkusoqarsimasinnaanera pillugu naalagaaffimmi oqartussaasut paasitinneqarnissaat. Naalakkersuisut naalagaaffimmi oqartussaasunut saaffiginnissuteqassapput, ataatsimiititaliallu maluginiaqqusaa apuullugu.

Naalakkersuisut iluarisimaarlugu maluginiarpaat ataatsimiititaliap isumaqatigiissup aalajangiiffigisassatut siunnersuut akuersissutigineqassasoq innersuussutigimmassuk.

Naalakkersuisut Kalaallit Nunaanni Naalagaaffiup sinniisuanit kissaateqarfigineqarput Naalakkersuisut CPR-imut inatsimmut allannguummut peqqussutissap atuutilersinneqarnissaanut oqaaseqaataata siunnerfigineqaqqaaraluartutut 1. januar 2016-imi pinnani 1. juli 2016-imi pisussanngorlugu kinguardeqqullugu. CPR-imut inatsimmi allannguutip allap, Inatsisartut 2015-imi upernaakkut ataatsimiinneranni immikkoortoq 79-itut suliarineqartup, atuutilersinneqarnissaata 1. juli 2016-imi pisussanngorlugu kinguartinneqarnissaa ilanngullugu kissaatigineqarpoq.

CPR-imut inatsimmi allannguutitut peqqussutissat taakku atuutilersinneqarnissaasa kinguartinneqarnissaanik kissaateqarneq pissuteqartinneqarpoq allannguutit angajoqqaatut akisussaassuseqarnermut inatsimmut marluullutik atammata. Angajoqqaatut akisussaassuseqarneq pillugu inatsimmut Kalaallit Nunaannut tunngasumut peqqussutit atuutilersinneqarnissaa, Ilaqutariit pillugit inatsisinut immikkoortuni 99-miit 101-mut ilanngullugit, Inatsisartut 2015-imi upernaakkut ataatsimiinneranni suliarineqarpoq.

Danmarkimi Folketingimut 18. juni 2015-imi qinersisoqarnissaanik nalunaaruteqarnerup kingunerisaanik inatsisissatut siunnersuutit taakku, Kalaallit Nunaanni ilaqutariinnut inatsisit nutarterneqarnerannut atatillugu Folketingimut saqqummiunneqartut, atorunnaarsinneqarput. Tamatuma kingunerisaanik angajoqqaatut akisussaaffeqarneq pillugu inatsit 1. juli 2016-imi Kalaallit Nunaannut aatsaat atuuttussanngortinneqassasoq naatsorsuutigineqarpoq.

Atuutilersitsinissap kinguartittariaqarnera Naalakkersuisut isumaqatigaat, angajoqqaatut akisussaassuseqarneq pillugu inatsisip aamma ilaqutariit pillugit inatsisit naammassineqannginnerini CPR-imut inatsisip allannguutaasa atuutilersinneqarnissaat tulluanngitsutut isigineqartariaqarmat.

UKA 2015/25-mut tusarniaanermi akissuteqartut arlaannaataluunniit najukkap immikkut illersorneqarnissaanut tunngasup Kalaallit Nunaannut immikkut sunniuteqalernissaa ilimaginngilaat. Tusarniaanermi akissuteqartut pingaaruteqartut isigivaat Kalaallit Nunaat Danmarkimisulli ilaqutariinnikkut aamma ataqqinassutsimut tunngatillugu eqqugaasut illersorneqarnissaannik periarfissaqartitsissasoq. Taamaalilluni atuutilersitsinissamik kinguartitsineq 1. juli 2016-ip tungaanut arlaannaannulluunniit ajoqutaanissaa naatsorsuutigineqanngilaq.

Taamaalillutik Naalakkersuisut innersuussutigaat aalajangiiffigisassatut siunnersuut taamatut isikkoqarluni akuersissutigineqassasoq. Aalajangiiffigisassatut siunnersuut Inatsisartunit ilalerneqarpat Naalakkersuisut naalagaaffimmi oqartussanut saaffiginnissuteqassapput, atuutilersitsinissap 1. juli 2016-imut kinguartinneqarnissaanik Namminersorlutik Oqartussat kissaataat akuersissutigineqartoq ilisimatitsissutigalugu.

Taamatut oqaaseqarlunga aalajangiiffigisassatut siunnersuut Inatsisartunut piumassuseqartumik oqaluuserisassanngortippara.